

**PEMBERITAHUAN PERTANYAAN DEWAN NEGARA
MESYUARAT KEDUA, PENGGAL PERTAMA
PARLIMEN KE-EMPAT BELAS**

PERTANYAAN : LISAN

DARIPADA : TUAN KAMARUDIN BIN ABDUN

TARIKH : 05 DISEMBER 2018 (RABU)

SOALAN NO. 33

Minta **MENTERI PENGANGKUTAN** menyatakan nasib pekerja-pekerja Suruhanjaya Pengangkutan Awam Darat (SPAD) dari aspek perjawatan seperti gaji minimum dan status kontrak terutamanya pekerja peringkat pertengahan dan bawahan selepas dibubarkan.

JAWAPAN

Yang di-Pertua,

1. Saya ingin memaklumkan bahawa SPAD merupakan satu entiti berstatus Badan Berkanun Persekutuan Diasingkan Saraan (BBDS) yang tidak dibebaskan sepenuhnya. Agensi dengan saraan diasingkan tetapi tidak dibebaskan bermaksud agensi ini masih lagi tertakluk kepada kelulusan Agensi Pusat dalam menentukan urusan butiran perjawatan dan skim perkhidmatan. Dalam hubungan ini, SPAD telah dibekalkan dengan skim perkhidmatan sendiri yang mempunyai tangga gaji yang berbeza daripada lain-lain skim perkhidmatan yang sedang diguna pakai dalam perkhidmatan Kerajaan.
2. Berdasarkan status SPAD sebagai BBDS yang berbeza skim perkhidmatannya berbanding skim-skim perkhidmatan yang terdapat dalam perkhidmatan awam persekutuan, peraturan pelantikan ke perkhidmatan awam yang berkuat kuasa tidak membenarkan pemindahan para kakitangan SPAD diserap atau istilah sebenarnya ditukar lantik secara terus ke dalam perkhidmatan awam samada ke Kementerian Pengangkutan (MOT), Agensi Pengangkutan Awam Darat (APAD) atau pun Jabatan Pengangkutan Jalan (JPJ). Dengan pembubaran SPAD, maka semua kakitangannya perlu ditamatkan perkhidmatan selaras dengan peraturan-peraturan berkuat kuasa seperti Akta Suruhanjaya Pengangkutan Awam Darat 2010, Akta Kerja 1955, Akta Pencen 1980 dan Akta Badan berkanun 1960.

3. Atas keperihatinan kerajaan, kakitangan SPAD berkenaan akan ditawarkan untuk berkhidmat dengan kerajaan bagi mengisi jawatan-jawatan yang dikenal pasti bersesuaian di MOT, APAD mahu pun JPJ. Walau bagaimanapun, tawaran tersebut akan dibuat berdasarkan peraturan pelantikan ke perkhidmatan awam yang berkuat kuasa dan bersandarkan skim perkhidmatan persekutuan yang secara umumnya menawarkan pakej gaji yang lebih rendah berbanding sesebuah BBDS. Penetapan gaji yang ditawarkan akan dibuat oleh Suruhanjaya Perkhidmatan Awam selaku Pihak Berkuasa Melantik berkaitan mengikut peraturan yang berkuat kuasa dengan juga mengambil kira pengalaman kakitangan yang relevan dengan jawatan yang ditawarkan. Penetapan gaji tawaran berkenaan sewajarnya dibuat berpandukan peraturan berkuat kuasa bagi memastikan keteraturan urusan dan keharmonian jangka panjang di kalangan anggota perkhidmatan awam, khususnya mengambil kira juga perspektif kumpulan majoriti penjawat awam yang sedia ada berkhidmat dengan perkhidmatan awam negara ini.

4. Keputusan penawaran pelantikan secara kontrak diputuskan berikutan kebolehlaksanaannya mengambil kira jangkamasa singkat yang ada sebelum pembubaran SPAD, disusuli penubuhan APAD menggantikannya yang ditetapkan pada 1 Januari 2019. Pelantikan secara tetap mengikut tatacara dan prosedur pelantikan ditetapkan oleh Suruhanjaya Perkhidmatan Awam memerlukan tempoh masa lebih panjang yang menyukarkan sasaran pelaksanaan pada tarikh 1 Januari 2019 tersebut.

NO. SOALAN: 33

5. Berkenaan tempoh pelantikan secara kontrak selama dua (2) tahun yang ditawarkan, saya ingin memaklumkan bahawa ianya merupakan tempoh masa yang diperlukan oleh pihak kerajaan untuk menguruskan pelantikan secara tetap kakitangan SPAD yang **berkelayakan** ke dalam perkhidmatan awam mengikut tatacara dan prosedur yang ditetapkan dalam peraturan berkuat kuasa dengan mengambil kira bilangan keseluruhan kakitangan SPAD yang terlibat berjumlah 997 orang.
6. Syarat dan terma perkhidmatan yang digunakan adalah sepertimana yang terpakai kepada semua penjawat awam kontrak yang sedang berkhidmat dengan kerajaan pada masa ini berdasarkan peraturan berkuat kuasa iaitu Pekeliling Perkhidmatan Bilangan 2 Tahun 2008.
7. Kerajaan akan sentiasa berusaha membela pihak-pihak terlibat tanpa mengenyepikan keadilan dan kesamarataan terhadap lain-lain anggota perkhidmatan awam secara keseluruhannya.

Sekian, terima kasih.